

PIPPU CACOPARDU

Na matina rimunnava l'arvuli di mè figliu nta un pizzuddu di terra chi havia pigghiatu pi fabbricari ma poi unn'happi chiù la possibilità. Passau Gaspari Rubinu curatulu no Baruni Alestra o castiddazzu, mi purtau na littra da Svizzera. N'assittamu tutti rui supra u coddu du puzzu e la rapu. Era un Pueta Catanisi chi travagghiava a Svizzera cu sò frati Vitu, e mi rava a capiri chi forsi niatri rui n'haviamu conosciutu forsi in un radunu di Puisia.

A PIPPU

Nui nun si conuscemu caru Pippu
iò puitiu sulu mentri zappu
comu l'acquazza morta fici lippu
pirchè mè mogghi nun voli chi scappu,
semu dù rami di lu stessu cippu
semu dù pezzi di lu stessu trappu;
comu t'incontru na boffa t'allippu
e c'un vasuni la vacca t'attappu.

Mentri voli accusà la sorti rria
siguemu ognunu lu nostru distinu,
nun trascurari mai la Puisia
canta e scrivi sempri di cuntinu;
però m'ha fari na gran curtisia
datu chi tutti dui siti vicinu:
vogghiu chi duni un vasuni pi mia
a d'amicuzzu di Vitu Rubinu.

Dintra dda littra riddu c'era lu sò ndirizzu, ssà Puisia la mannai a iddu, mi rispunniu mannannumi puru na fotografia cu na coppa nmanu e un diploma appesu a la pareti di la stanza. Ma puisia nenti.

A PIPPU

Lu to ritrattu ddù giuiellu raru
tù nun criri mai quantu l'aduru,
lu tengu pi ricordu tantu caru
e lu sarvai non postu sicuru;
ci misi lu mè Cori pi riparu
e pi curnici, l'affettu chiù puru;
sì di la puisia lucenti faru
pirchè risplenti macari a lu scuru.

Cu ddù beddu diploma e dda gran coppa
sì granni vati di la nostra stripa
iò nveci sugnu na pecura zoppa
chi s'accuntenta di chiddu c'ascippa,
Pippu la musa tua trotta e galoppa
canta pi Rosa, Lucia e Filippa;
e lu tò cantu dunni scoppa scoppa
allegra cori vuriddami e trippa.

*Nel gennaiu du 1970 avennu iò tri figghi a Caronnu Pertu-
sella ci purmisi chi ni putiamu ncuntrari.*

A PIPPU

Lu disideriu chi stu cori spera
vogghiu chi Cristu mi lu fa passari,
si vegnu ddocu na sta primavera
un misi prima ti vogghiu avvisari;
emu a fari di versu e di manera
di modu cunn'havissimu a sbagliari;
facemu un bellu ncontru a la fruntera
chi com'un frati ti vogghiu abbrazzari.

RISPOSTA DI PIPPU

C'un garofanu rrusu ntrà lu pettu
e lu giornali « Pò tu cuntù » nmanu,
quannu lu rici tù vegnu e t'aspettu
dintra di la stazioni di Milanu,
c'appena tù arrivi sugnu certu
chi mi conosci a trè migghia luntanu;
comu tù viri la pruḡosta accettu
abbasta cunn'aspettu un'annu sanu.

LA ME' RISPOSTA

Staiu gustannu la gioia chi provu
a mal'appena c'à Milanu arrivu,
però si senza mai nun ti trovu
mi ncazzu veramenti, mi uncurrivu;
di dintra la stazioni nun mi movu
anzi vegnu ddocu, e nun ti scrivu;
e s'haiu la furtuna chi ti scovu
poi stari certu nun ti lassu vivu.

Ma st'incontru a Milanu nun successi. Sò muggheri fù malata e bisugnau turnari a Catania. Mi mannò lu sò ndirizzu. E doppu che pirsuarivi a mè muggheri lu ivi a truvari a Catania.

A PIPPU

Cu la famiglia mia sugnu ncazzatu
matri e figghioli ficiru cumplotu,
e ghiò staiu murennu ncuttumatu
chiangennu comu un fissa cotu, cotu,
disprezzu lu distinu sciliratu
chi l'havi sempri cu stu Pacicotu;
un gnornu sulu, mi vinnì accurdatu
pi darti dū vasuna e mi ni votu.

La mè surtazza vili maliricu
comu li picciriddi, chiangu e sfogu,
lu dicinnovi cu ddu suli appicu
pi tannu distinau lu mè traslocu;
quantu ti vogghiu beni, un ti lu ricu
chi quantu ricu ricu è sempri pocu;
penza chi pi conusciri n'amicu
mi partu di Paceca e vegnu ddocu.

Ma caru Pippu nun ti lusingari ?
nun portu nè ricchizzi nè trisori,
anzi ti pregu nun mi cinsurari
si mentri chiangu nun trovu palori;
un gran ricordu ti vulia purtari
pinzannu chi si nasci e chi si mori;
ma sennu ddocu ti vogghiu assignari
un postu riservatu na stu Cori.

*Versu lu deci di settembre fù tuccateddu di n'angina, scu-
raggiatu lu cunfiru a Pippu, mi rispusi di luttari pi la vita.*

Pippu iò nun sugnu risulutu
comu tu viri un dugnu mancu ciatu,
ruppi la spada, persi lu mè scudu
lu Cori ntanti parti trafuratu
mi sentu mortu fora lu tabbutu
c'aspetta essiri sulu sottirratu;
perciò ncruciu li vrazza e restu mutu
m'arrennu a lu distinu sciliratu.

Siddu ogni tantu senti la mè vuci
è chiantu lamintusu ed infelici,
restu assittatu all'umbra di sta nuci
lu Cori sempri spostu pi l'amici:
aspettu lu parrinu cu la cruci
e GESU' CRISTU chi mi binirici.

RISPOSTA DI PIPPU

Guglielmu iu nun sugnu rassignatu
mi piaci di luttari e stari mutu,
quannu on'omu la vita l'ha spurpatu
spiranza unn'havi chiù sulu un tabbutu,
cu tuttu chissu mezzu frasturnatu
e certa voti quasi nzalanutu
pigghiu la vita comu l'haiu pigghiatu
e mi sentu un pupazzu stravistutu.

Sentimi amicu, un Pueta di cori
canta la vita, la gioia e l'amuri,
nun s'avvilisci ntra li scattacori
canta la primavera e li sò ciuri;
e tutti li cusuzzi primalori
e si senti vicinu a lu Signuri.

*Però quannu arrivau sta risposta iò eru o spidali cù l'infartu.
Doppu 23 ghiorna scivi e ripigghiavi la currispunnenza.*

A PIPPU

Allegru Pippu sentimi cantari
chi dopu setti iorna d'agunia
comu Cristu mi viù risuscitari
mortu ci ricitai na Puisia;
quannu la morti mi ntisi parlari
cu li lagrimj all'occhi mi ricia:
tù sì Pueta ti lassu campari
fazzu un piccatu sippilliri a tia.

Mi lassau vivu e mi ni vantu
com'un cardiddu la passu a cantari
bussai la porta di lu campusantu
ma lu custodi un mi fici passari,

tuttu trimanti e pigghiatu di scantu
a la mè casa mi vitti purtari;
e nsemi a la mè Musa scrivu e cantu
facemu Puisì e tiru a campari.

LU PUETA

Nun servi scola, nun servi cultura,
nudda licenza di filusofia,
nun ci sù dotti, nun c'è prufissura
nè discinnenti di na Barunia;
c'è mastri, c'è viddani, c'è pastura;
ci ni sù nchiesa, ci nè nfarmacia;
chi suggiruti di matri natura
ogni sillaba d'iddi è Puisia.

Pi cunusciri un Pueta,
nun ci voli lu gran chì
littiratu o analfabeta
si conosci d'accussì.

Lu Pueta ricurdati
havi sempri la mania
dintra, fora, o strati strati
puru sulu, chiacchiaria.

Siddu mangia, siddu vivi
si si trova a travagghiari
cu n'ottava vi discrivi
luna, celu, terra e mari.

Di li pianti, di l'armali
soccu scopri pi la via
ni fà un quadru naturali
cu na bedda Puisia.

Ci ni sunnu prufissura
ci ni semu analfabeta
è capricciu di natura
fari nasciri un Pueta.

Nun ci voli littirati
nun ci vonnu prufissura
li Pueta sù dittati
di la simplici natura.

Basta sulu l'intillett
sia allegru o nculluratu
cu n'ottava, o cun sunettu
vi descrivi lu criatu.

Tempu mettilu ngallina
sia vecchiu o giuvinottu
temp'un nenti vi cummina
un billissimu strambottu.

Ma duviti ricurdari
ch'un Pueta basi prima
si bisogna rigulari
ncunzunanti, metru e rima.

Issi a scola e si va 'mpara
littiratu o analfabeta
si sti reguli nun supera
stati certi, unnè Pueta.

Ddi paroli misi a muzzu
senza rima nè curuna
assimigghianu un gadduzzu
senza chicca nè spiruna.

Haimè chi spauracchiu
siguitannu ssù sistema
v'ha finisci ch'un pirnacchiu
lu descrivinu Puema.

Ma la vera Puisia
è di simplici palori
la ducizza e l'armunia
caccarizzanu lu cori.

C'è Pueta ranti, ranti
v'ha sintitili cantari
rima, metru e cunzunanti
chi vi fannu nnamurari.

s'ogni ghiornu essennu a spassu
vui sintissu ddi cantati
chiu; a la casa nun turnassu
ma ristassu nsintumati.

Chi sintennu i nostri versi
cun sù fatti cu palori,
sù pizzudda di nui stessi
spicicati di lu cori.

Senza pinna, senza carta
senza seggia e tavulinu
ma na macchina ben fatta
chi sculpisci di cuntinu.

E li versi chi sintiti
sunnu incisi cu scarpeddu
e ni restanu sculpiti
nta lu nostru ciriveddu.

Sia Ciccu, Peppi o Nzulu
chi camina senza mèta
e pi strada parla sulu
stati certi ch'è pueta.

LA PACICOTA

Siddu mi criri, è na simpaticuna
la sò parlata libira e baggiana
si senti di lu Munnu la patruna
la caminata nobili e spartana;
la sò taliata comu d'ù spuntuna
spirtusa lu tò cori e lu trapanu;
ti fà pigghiari petri a muzzicuna
e idda si ni prea e s'alliana.

Si ti nmriachi, idda sinn'adduna
cu l'occhi di na vulpi iuculana,
accetta li carizzi e li vasuna
però nun fari na pinzata strana
si nun ti la mariti, un ti lu runa
un sghicciu d'acqua di la sò funtana.